

MORNG IST BIDER AN ÒNDERN TO

EN DER VRIA

AUSTEA' IST A GROASA MIA.

BASCHEN S TSCHICHT

FINZ AS MEN SECHT NICHT,

BASCHN DE ANG ONT DE HENT

PET EN BOSSER AS NÈT PRENT.

KEMMEN ARAUS VAN ZIMMER

AUTEA' DE BALKETER

ONT SCHAUNG BES IST GAHOATER

AN GUATN SCHELVER MIAS MEN MÒCHEN

DERMIT AS DER KORPER TUAT AUBÒCHEN.

MEN LEIK U' DER KAPÒTT

ONT DÒRA PET EN KAMARÒTT

AF DE ÒRBET MIAS MEN GEA'

ONT PET GROASES GADULT EN DE MISTERN MIAS MEN NOSTEA'.

DE STUNNEN GEA' GAHASSE VERPAI

AS SCHUBET IST UM DRAI.

DE LAIT HOM AN SCHOUBER GACH

AS BENN AS IST UM VINVA LAVEN SA VERT ABIA AN RACH

OBER VOUR AS MEN HOA'M KIMMP

MIAS MEN GEA' ZA KAVEN INN

PROAT , VLAISCH ONT RUAM ZA LEING EN KÈLDER

ONT DERZUA DE MILCH ONT SIASERAI VER DE KINDER.

PET EN AUTO GEAT MEN HOA'M
ÒLLA ALOA' EN DE SAI' GAMOA'
DE KINDER BÒRTEN DE ELTERN
ZA KOCHEN AS DE NÈT VERHUNGERN.
DE NÒCHT IST PAHENN DO
ONT MORNG IST BIDER AN ÒNDERN TO.

DÒS IST DER TO VAN LAIT HAIZEGENTO

OBER ABIA HOM SE S VERTRIM DE LAIT VAN A VÒRT AS SAI' NEA'MER DO?

VER DE LAIT VA NA VÒRT AUSTEA' RUNT VRIA
IST NÈT GABEN A GROASA MIA.
DE SAI' GÒNGEN KAN STÒLL ZA MÈLCHEN DE KIA
TSETZT AS EN MILCHSTUAL ODER AF DE KNIA.

DE HOM GAMISTET ONT PUTZT ÒLLS SCHEA'
ONT EN DE KIA AN SCHOUBER NOSTEA'
GEM EN DE KELBER DE MILCH
ODER LARN SA AUS PET A SAICH .

DER STÒLL IST NET ÒLBE GLAIM GABEN
ONT EN BINTER HÒT MEN GAMIAST DER SCHNEA VORT TRAIM
ZA MOCHEN A STRASL ALMEN .

EN SUMMER ENVEZE SAI' SE GÒNGEN EN VÈLT PET DE KESPN
ODER PORBES OBER DE HOM GAMIAST AUPASN VARE BÈSPN
DE SAI' GABEN EN DE BISN ZA RÈCHEN S HEIB PET DE PLINDER
ZÒMM EN DE KINDER.

AN ÒRBET AS HOM GAMIAST TEA' DE KINDER ONT DE BAIBELER
IST GABEN KLAUM AU EN BÒLT DE KLOA'N ASTLER,
DE SAI' GABEN RUNT DÈSTER
ZA KENTN U' S VAIER
ASOU HOM GATUN DE PALAIER.

A VLASCHL GERSTAN KAFÈ ONT A STIKL PINZ
ONT MEN HÒT SE GAHEART ABIA AN PRINZ.

VERTRAIM DER TO PET DE KIA ODER EN BÒLT
VA GÒNZ KLOA' FINZ AS MEN IST KEMMEN ÒLT.

VIL ÒRBETN SAI' KEMMEN GATUN VAN INGERN LAIT
PET GROASA MIAN ONT KRÒFTEKAIT
OBER DE HOM ÒLLS GATU' PET VRAITSCHÒFT ON VROEKAIT.
ONT BENN AS DE HOM GALEP AN SCHEILEN MOMENT ODER EPPES NÈT SCHEA'
HOM SA TSBUNNEN "**MORNG IST BIDER AN ÒNDER TO, LO GEA**"